

Атаспыт Сергейчик араначчылыы сылдыа диэн билэбит

Бүгүн, ахсынны 5 күнүгэр, чугас доборбут, атах тостор атаспыт Сергей ИВАНОВ эмискэ күн сириттэн барбыта 40 хонуга буола оҕуста. Аҕыйах күнүнэн ый бүтүүтэ 29-хун туолуохтаах этэ. Сергейчик олус көхтөөх уонна массыынаҕа улахан интэриэстээх буолааччы. Суоппарынан үлэлирин таһынан суоппардарга аналлаах тэрээһиннэргэ 2014 сылтан добороторунаан ситиһиилээхтик, көхтөөхтүк кыттан кэлбитэ. Онтон 2016 сылга кини көрүүтүнэн, баҕа санаатынан "ЛЕГИОН-Нюрба" диэн автоклуб тэриллитэ. Ол саҕана ыччат отдела Сергейчик үлэлиир үп-харчы управлениетын кытары биир дьиэҕэ баара. Дьэ, онно кэлэ-бара сылдьан, санаатын этэн, туруорсан, "Массыына күрэбин оноруохха", - диэн хаайан "Полный привод. Нюрба" күрэх былааннамыта, түмсүү тэриллэн барбыта. Кулууп былааҕа тутуурдаах бастакы исторической хаартыскабытын Сергейчик үлэлиир сирин коридорыгар түспүпүт. Аан бастаан биэс киһилээх, онтон билигин элбэх ыччаты угуйар, үгүс ситиһиилэрдээх, ааттаах-суоллаах түмсүү буолан турар. Ол курдук, суон сураҕырбыт "Хаар айан" УАЗ массыыналар күрэхтэригэр хас да сыл кыттан, суоппардар бэйэлэрин кыахтарын, сатабылларын көрдөрөн, Нюрба аатын ааттатан, чизин көмүскээн, бэйэлэрэ элбэх дьонтон өйөбүл ылан, тэрээһиннэри тэрийэн, Саха Сирин автоспордун бастың спортсменнара билинэр кулууба буола улааппыта. Манна даҕатан этгэххэ, Бүлүү бөлөх, Дьокуускай энэр автоспордун ыччата кытары Сергейчигы ытыктаан дьонугар көмө ыһпытара. Өрөспүүбүлүкэ араас мунуктарыгар тийэн, кулууп, дойду былаахтарын өрө тутан ситиһиилээхтик, түмсүүлээхтик да сылдьарбыт. Бу кулууп атын өрүтэ - күүстээх добордохуу, түмсүү. Уолаттар күрэхтэн күрэххэ эрэ буолбакка, күннээҕи олохторугар чугасыһан, бэйэ-бэйэлэрин өйөһөн, эрэллээх добортор, аллар атастар буолбуппут. Этэргэ диэри үөрүүгэ да, хомолтоҕо да бииргэбит, "Легион" баар диэн бигэ эрэллээхпит. Ону таһынан бу эйгэҕэ түмсүү чилиэннэрин дьиэ кэргэннэрэ, дьонноро эмиэ чугаһаан, өрүү бииргэ сылдыһан, кэргэннэрэ кынат буолан ураты күүһү биэрэр эмиэ туспа түмсүү курдук буолаллара. Күрэх аайы кэриэтэ Сергейчик эһэллээх эбээтэ, төрөппүттэрэ, кэргэнэ, уола, аймахтара кэлэн ыалдыааччылар, Нюрба да таһынааҕы тэрээһиннэргэ сылдыһааччылар. Бу олус элбэҕи этэр. Итиннэ барытыгар Сергейчик анардас баҕа санаатын күүһэ эрэ буолбакка, кини түмэр сатабыла, ханнык баҕарар дьыалаҕа эппиэтинэстээх сыһыана, киһи быһыытынан үтүөтэ, көнөтө, майгытын мааныта уонна иитиитэ көстөр. Саха омук чулуута, мындыра, олоххо көрүүтэ барыта киниэхэ баара. Массыынатын да мээһэҕэ "Булчут" диэн ааттаабатаҕа.

Биир сөбүлүүр дьарыга булт, балык этэ. Байанайын күндүлээн, сиэрин-туомун өрүү тутуһа сылдыара. Киһи киһини саныырын тухары баар, тыыннаах дииллэр. Онон бу кини улахан баҕа санаатын төрүөтэ буолбут "Легион" автоклуб бастың ыччат, добор-атас, автоспорка суолун хаалларбыт Сергейчик уол аатын үйэтитэргэ сүрэхпитин ууран, биир сомоҕонон эһиилтэн саҕалаан сүүрүөхпүт-көтүөхпүт, тэрийиэхпит диэн санаа ылыммыппыт. Дьон-сэргэ өйүө диэн эрэнэбит. Аартыкпыт алгыстаах буоларыгар атаспыт араначчылыы, түмсүүбүт өссө тирэхтээх буоларыгар күүс буола сылдыа диэн биһиги билэбит...

Дьиэ ылынан бу күһүн биир улахан баҕа санаатын толорон Сергейчик сүрдээх улахан гараж туттан барбыта. Оҕо эрдэбиттэн техникаҕа, айанга сыһыаннаах, суоппар үлэлээх, массыына аргыстаах киһиэхэ, биллэн турар, гараж иккис дьиэтин кэриэтэ. Онон "Үйэлээх буоллун" дии-дии уолбут олох олохтоохтук оностубута, былааннамыта. Аймахтар, добортор көмөлөөх ол улахан гараж бүтүөбүн аана эрэ хаалбыта... Куһаһан сонуну истэн бары да испитигэр олус аймаммыппыт, билигин даҕаны өйбүтүгэр киирэ илик. Ол эрэн түмүллэн, хайдах эрэ сааһыланан туох кыах баарынан дьонугар, дьиэ кэргэнигэр көмө буолан, "Булчуту" эһэн, сүүрэн-көтөн тиһэх суолугар атаарбыппыт, ол да кэннэ өйөбүл

буолбуппут, инникитин да көмөлөһө туруохпут. Аны туран туох баар чугас доҕоттор, атастар Сергейчик баҕа санаатын тиһэҕэр тиэрдээри бэйэтэ арыллар-сабыллар гараж аанын тутатына уһаппакка атыылаһан, туруоран биэрбиттэрэ, уола Сергей оһоҕун оттон иччилээбитэ. Ити барыта Сергейчик бэйэтэ хайдах курдук үчүгэй киһитин көрдөрүүтэ буоллаҕа. Алтыспыт дьонун өттүттэн кини кылгас, ол эрэн сырдык, чаҕылхай олоҕун эппиэтэ диэххэ сөп. Доҕорбут күлэн кэбиһэ-кэбиһэ олус элэккэй майгылааҕа, ханна наадаҕа кытаата түһэрэ, хаһан да туохтан да туора турбатаҕа. Группабытыгар "Сергейчик манньк гыммыта...", "Сергейчик оннук диэбитэ...", "Сергейчик хайдах эрэ гыныа этэ..." диэн хабааннаах кэпсэтиилэр кэмиттэн кэмигэр буолан ааһаллар. Уонна бу сүтүк олоҕу сыаналыырга биһигини өссө төгүл үөрэттэҕэ. Эрэллээх доҕорбут туйаҕын хатаран, аатын ааттатан соҕотох оҕото Сэргэй уол оҕото буола улаатыа диэн эрэнэбит. Сергейчик эһээлээх эбээтигэр, төрөппүттэригэр, кэргэнигэр, уолугар, аймахтарыгар кытаанах санааны, чэгиэн буолууну баҕарабыт.

"ЛЕГИОН-Нюрба" автоклуб кыттааччылары, доҕотторо.